

康對山先生集

康對山先生集卷之三十八

墓志

明故通議大夫兵部左侍郎陳公墓志銘

公諱震字文靜上世武進人也曾祖肆從

太祖皇帝定天下有功累陞都督僉事而蔭其子友
為蔚州衛指揮同知正統間改慶陽衛故子孫悉居
慶陽云指揮公生二子長福季祿福公父也當襲而
卒後以公貴贈監察御史配孺人汪氏生公先是御
史公夢老父以玉麟與已曰是汝子當以文易武也
已而公生神宇凝重氣度洞達人咸異之洎長受易

於鄭州王先生未幾有內艱。氣氣無依。乃依叔父祿而祿。天性孝友。視若所出。故公得肆力於易。成化甲午。中鄉試。高等數試。禮部不第。益自砥礪。卒登丁未費宏榜進士。弘治戊申。拜某道監察御史。風裁凜然。凡所按行。姦貪望風而解。寃者平。逮者釋。時以為真御史也。丁巳。陞山西按察司副使。耻尚嚴峻。務以德化而已。壬戌。陞本司按察使。憲度益修。人用丕變。曰風俗相沿。則頽弊滋至。至是不可以文法繩易也。曷以禮教興起其義。意人能知義。則廉耻生。廉耻生。則歸訟自息。此古人之已行。復何疑者。今山西人重廉。

恥尚禮義。遵矩履規。無復曩昔風聲氣習之累者。公之教也。正德初。以御史盧儀事誣誤。左遷兩淮鹽運使司同知。尋轉長蘆運司。而支正三品俸。公曰。是不可以已乎。於是力請致仕。得。

旨命。允。居數年。吏部薦公才可重授。陞光祿卿。已復陞戶部右侍郎。庚午夏。值賓藩反逆。改公為兵部右侍郎。兼都察院左僉都御史。總全陝之師。以討之。京師至寧夏四千里。公但以十九日至。則罪人已獲。公乃宣布。

上意。撫安夏人。而屬鎮西將軍曹雄收其餘黨。其審。

實叛逆、悉命指揮黃正起解。於是寧夏遂定。還及中途，會遼菴先生以

命至，與公代兼有

勅獎勵公之功。伐八月，劉瑾伏誅。公罷歸慶陽。會辛巳。

詔復其原秩，致仕。公自歸田，垂二十年，優遊之趣，恭儉之節，上可以參諸古人，下可以式諸來學。豈非超世之資，振古之豪傑哉！嘉靖乙酉正月壬午，公壽七十又九而卒。詎其生，蓋正統丁卯某月某日也。初配余氏。先公三十六年卒，贈孺人。生子三人，大綱、大經。

大綸大綱丁丑進士今為四川按察司僉事繼郭氏
亦封孺人卒又繼郭氏生一女子配應襲指揮王威
又卒又繼徐氏皆以僉事貴封孺人側室鄧氏生子
大緒府學生梁氏生子大紳公凡有五男子一女子
也孫男子邦傳邦佐邦佑邦俊邦傑邦儒凡六人而
邦佐學舉子業孫女子二人而長許指揮襲子張羽
次許百戶襲子周樞是年十月癸卯大綱將奉公柩
啓余孺人之窆合葬於城北先塋謂海與公為同年有
世契且嘗熟知公之行誼宜以銘其墓石海惟閩中
前修之士多僑近而指遠發為議論要皆可以見諸

行事故其功業豐顯世希儷焉。若公蓋又其表表者矣。公立身甚嚴而遇事不苟。夷居明習國家之事無鉅細執其樞要。至於低昂起伏有智者萬慮而不可及者。使公得究其所指。則古將相之業奚愧哉。公又無所不學。天文律曆具得其妙。京房管魏不讓也。慶陽北定邊營有妖。自名趙太白。日與人盃酒相築定邊諸貴人自參將指揮以下罔不狎而遊之。有貧乏者妖轍重以賙予。及所厭怒。即以鉄簡飛擊之。妖知公來定邊訪其所厚。謂諸貴人曰。明日慶陽陳舉人至。我與有干係。不可相見。當與諸君永別已。而公至。

則其稟賦之正。為物所畏憚如此。洎公之貴。姦邪畏於朝。豪強畏於野。可謂幽明無間。終始弗渝者矣。銘曰。猗猗關輔。世有哲人。振衰拯溺。以匡辟君公。起錫胤。亢宗浚源。薦歷樞要。卒開爾陳。執憲有度。何奸弗泯。入貳本兵。厥武允聞。殪此大敦。倏疾若神。乖被斐枉。遂韜大珥。慶城戡戡。我公居豈屯。貞德靡究。哀此下民。壽考永怡。子孫振振。北原窿窿。用作公墳。億萬斯年。我銘在珉。

明故通議大夫四川按察司按察使馬君墓志銘

君諱應龍字公濟其先鳳陽人也不知自幾世祖移居河州今其子孫世為河州人高祖曰英魯祖曰志祖曰文考曰全俱稱長者娶王氏生三子長應夔早歿次某君其季也生君時考已七十餘君生七歲即好讀書手不釋卷考甚愛之又恐其勞母曰兒欲讀書是心誠悅於學也乃復靳之邪河州人至今傳云君之成王安人之訓也王安人者君為主事時有勅並其考封如其官故鄉人因稱之也發蒙之明年即習尚書日記數千言不踰年而旁通易詩禮樂春秋下筆成文雖老師宿儒咸自以為不及十七入州

學諸提學皆以為佳士。而遂菴先生獨奇之曰：此子所就不止科目也。虎谷繼邃菴取君緝學正學書院。予時已領鄉舉。或過長安。虎谷輒語予曰：馬應龍書院諸生未能或之先也。弘治乙酉果中鄉舉第二。正德辛未登進士高第。除戶部江西司主事。值流賊劉七等寇河南。

上命文武大臣討之。君督餉馬賊平。賜銀十兩。紵絲一表裏以勞之。又踰年蜀盜尚未平。於是命都御史彭公澤代尚書洪公鍾總制西征。軍務仍以兵部員外郎張君嘉謨與君參軍督餉。未幾彭公舉君與張

君皆生長邊方。熟知兵事。宜令贊畫軍務。必有後勛。乃以延綏臨鞏洮岷兵馬付君。自為一支。君遂有中江之捷。斬首蓋數百人。兵勢漸盛。後至漢州。提督軍務都督時公源與陳副總兵官閻遊擊計事。聞報賊至城下。諸公方猶豫。君奮然提所部兵往勦之。大戰於三渡水。親斬劇賊一人。令士卒皆奮擊所向而靡。斬獲幾四百餘級。而中多渠魁。於是軍中皆以文武全才目君。捷上。

上賜君銀二十兩。紵絲二表裏。陞俸一級。班師後。又督糧宣大。乙亥八月。陞本部山東司。署員外郎。明年陞。

郎中尋奉

勅總理遼東糧儲收支皆有法正已格物積弊若洗
居一年軍民胥悅信畏若神尋以病乞歸調理
上許之居鄉三季所學益進止辛巳復除本部福建
司郎中行取北上道過武功與予語奇君可以大受
因賦詩贈君君至京乃數上言過事

上悉允行之嘉靖元年壬午陞山東按察司副使整
飭霸州等處兵備距京師但百餘里正德以後浸為
盜賊淵藪地又多中貴泊勲戚莊宅士無完器倉無
積粟家家魚并侮法吏不敢拂桀民猗玗掠邏不

能獲君至肅貞憲度振揚威武創修城池建置營堡
大易舊觀事新往勲於是民有畏志而吏漸捕邏漸
獲矣於是汰冗僊選精壯得勇敢千人給以利器厚
以糗糧訓以坐作養其銳鋒又積粟萬二千餘石以
備緩急不數月間石昶房景王陳奎梁臣等大盜七
百餘人洎窩主盧進胥銳二十餘家先後俱獲而姦
豪白鉞白景方等處以重法不通請謁由是民志惟
熙吏守不盭可謂承平之希覩矣其他明冤獄摘隱
昧不可勝紀地方之民皆諛位祠祀於家則君之所
以獲乎其心者豈聲音笑貌能邪巡撫都御史孟公

春以君治狀上聞

上以為難賞銀二十兩紵絲二表裏君宿有痰疾在
霸州五年加以公事旁午乃間作間疹逮丙戌章九
上乞歸

上皆荅以優旨竟不許歸冬十二月疾方劇忽有四
川按察使之命拜命又二月為嘉靖丁亥二月五日
而君卒矣於乎惜哉君生成化甲午八月二十四日
至是享年五十有四先娶王氏河州衛人王海女有
婦德宜於君君養病時卒生子一人汝良州學生娶
陳氏指揮陳淳仲女生孫女一曰膺瑞女子二人長

淑清適千戶韓通次淑英適百戶杜江皆卒繼娶胡氏衛致仕指揮使俊文生女一曰豐英王與胡皆封安人側室錢氏無出汝良奉柩歸葬北原新阡過武功衰經及予門以狀請銘云君臨終時語胡安人曰吾平生心事惟武功康子知之果死當令汝良求銘吾墓於乎痛哉君嘗私語予曰丈夫當磊磊落落自見於世一涉悔吝便安可易之霸人來送喪者君卒之日筐篋惟有俸金若干餘無一錢此可謂趨不渝志者矣豈非所謂丈夫乎哉銘曰吾已見其文乃復聞其芬顯不異操履無愧云名德振振光我雍秦

承休萃祥允在子孫貞珉弗磷萬年永存

贈刑部郎中尹君宜人盧氏合葬墓志銘

君諱賓字容至大名濬人也居濬新鎮店里中至老且死未嘗有事入官府見鄉鄰有鬪者遠遠畏避有賦役皆先期完之母致吏怒濬父兄士大夫皆禮重之人有毆族女弟死者毆人賂族人各千錢族人皆已受矣至君君曰吾不能報妹死命乃復利財耶邪濬之人由是謂為長者成化庚子十月五日卒諱其生永樂辛丑六月十日年纔五十又八娶盧氏能類公德性又能事舅姑舅姑皆愛喜之以為有婦公卒

豐山集卷二十一
四年癸卯子雄舉鄉試又十年癸丑舉進士為中書舍人

勅贈君徵仕郎如其官封廬太孺人後雄為郎中
誥又贈君奉議大夫如其官封太孺人太宜人矣太
宜人以正德二年丁卯四月十二日卒生宣德庚戌
七月八日年七十又八也有男子三人雄與傑仁也
傑守君業為農仁上粟為義官女子三人皆嫁大族
又孫男子五人孫女子十一人也某年月日雄以太
宜人合葬于君以狀來乞銘銘曰翁也作之姆也享
之鄉人也試之茲其勿窮者耶

中順大夫知永平府劉公墓志銘

公諱傑字世英自曾祖允德祖振父平為高陵人平
配鄭氏生公景泰癸酉中鄉試明年甲戌第進士辦
事戶部管發雲南賞勞軍銀將佐莫敢以私相托還
授主事貴州草塘之後又以公管給軍餉及草塘平
遷郎中終三月除知湖州府能整齊其政以上幣為
內官所怒退所上七十餘匹劾降真定府同知以母
憂改平陽府尋陞知永平府永平富民為校尉誣盜
背縛遍令諸富家嚇詐有厚獲乃輒釋去百姓騷然
無寧居官吏皆畏而莫敢與正公誘人告遂發捕校

尉校尉各遁去乃謀中傷公遂以去位百姓皆號啼從之巡撫都御史楊繼宗力辨其誣弗從弘治壬戌七月甲子以疾卒壽七十有六娶魏氏蚤歿無所出繼娶王氏生子二時蘭時蕙王沒又繼娶王氏生子二時夢時黃側室趙氏生子一時薰凡五子時蘭與余舉戊午鄉試以是歲某月甲子將與魏王兩安人合葬祖塋之傍時蘭以狀來乞銘銘曰嗟維關中時有俊人模幹於邦丕敬德意遠給遐荒情不以累草塘再興兵勢如熾岳薦於公人孔憂惕公曰曷有爰往無忌事既底平時公之勤大夫之遷群口咸是三

月出守時靡有繼憂此疲民貽公左滯公曰何嫌寔
予之致及蒞永平校尉恣肆戮我亡辜我復何繫發
捕乃亡官以卒森赫赫烈烈終靡以易沉香木屑群
口之矣公德孔昭昊天弗昧施于孫子公嗣萃萃高
陵之陽雙珉所瘞億萬千年惟公之賁

承德郎東昌府通判何君墓志銘

君諱景和字仲律汝寧信陽人也父曰封徵仕郎中
書舍人信母曰封孺人某氏生四男子其長者君也
君年若干舉河南鄉試累試禮部不第乃拜為巴陵
令巴陵滿遷東昌通判通判六月卒東昌官舍中李

第中書舍人景明者予同舉進士者也言君性狷介
與人不易合又淡泊能貧賤也初往令巴陵人皆曰巴
陵蕪穢不治吏民不與列服役也令未有終三年弗
敗者即弗敗又未有弗奔走死也君至出約束召父
老布黔首事事皆整齊亡不集矣有所役往吏民皆
惴惴恐不稱指其桀傲無狀者畢沛然率也又能有
暇日置酒召賓客弗匍匐奔走也然纔四十又六歲
而死所享又靡有厚也於戲惜哉君少時事徵仕公
每有過見顏色弗悅已候候已寢跪門外或夜中父
起問之曰兒弗孝弗能悅父也予訪中書君見君所

予書皆長者友愛使者頃以訃告矣於戲已矣君初娶鄧氏早歿娶夏氏生一女又歿乃又娶孟氏孟氏生二男子岳陽岳州且幼也某年月日歸葬信陽某山之陽舍人以銘請予銘曰溫溫恭人曷不永爾雖則不永實已炯爾瘞言茲立萬祀景爾萬祀景爾何不榮爾

明故嘉定州吏目張公墓志銘

公諱文政字以德其先乾州人上世祖世榮元末避亂徙居興平安谷坊今遂世為興平人云父諱本為興平醫學訓科娶介氏生公兄第三人曰文智文通

者皆第也文智嗣父為訓科而文通方家人業先公
十餘年歿公天性孝友事父母曲盡其道父母悅之
友于兄弟兄弟宜之怡怡如也年十五為縣學諸生
弱冠提學每試獨以為能置優等升廩膳諸生有不
悅者讀其文自以為弗若也然塲屋累屈於是甲辰
之飢出粟救荒為太學生弘治中除嘉定吏目或以
為屈公也公曰官不足以屈人顧恐人屈官爾居三
年上下咸稱善又曰吾幸不屈官然亦已小試輒驗
矣盍歸乎來以怡予之桑榆於是遂罷嘉定歸徜徉
梓里凡二十餘年嘉靖乙酉正月奄疾不起由生景

泰甲戌春秋七十有二初配劉氏有婦德宜于公年
五十二卒嘉定官舍中生男子二人縉國子監生紳
醫學訓科亦先公卒女子一人嫁里人袁沔繼娶牛
氏又卒乃又娶李氏孫男子二人洋寧孫女子八人
長者嫁人幼者許人惟兩女為紳出而二孫六女皆
縉出也洋有子女各一則公有曾孫矣其苗裔不已
勝哉今年戊子閏十月十六日縉將奉公柩啟劉夫
人之窆與牛夫人合葬焉以公姪監生經狀來請銘
于予予繼娶公季子訓科之女義不可辭於是銘曰
維張氏世有茂德至公益隆仕不似德歸已有終西

原峨峨其葬肆好篤慶逖光子孫維紹公用休哉萬
年是保

南城兵馬司指揮馮公墓志銘

公諱義字時宜家世武功人也曾祖成生春春生內
鄉丞諱寅惇德好學教人弗厭有古昔鄉先生之風
焉海為童子時實從內鄉公遊是時內鄉公方仕宦
歸餘祿猶初也而終日端坐聚徒為教海侍數年絕
不見與人群飲此其誼意豈但近世鮮見哉內鄉公
配李氏生三子長曰仁季曰智其仲乃公也公生而
篤厚長而克敏累舉不第弘治甲子歲貢上禮部海

時承乏翰林與公日相往來有士人某者素陰騷公
或又至面謾公公遇之一如罔有聞者後士人攬糧
失利諸納戶執而聲訴矣與士人素厚者皆避不與
士人言公聞之獨匍匐詣予酸淚雙下曰吾何忍其
妻子之不能還與其身之就死無救也立券求予貸
予方怨此士弗馴于藝若是卑也乃因公之誼有哀
心焉於是求所厚者得五十金予公公持以投納戶
士人獲免焉公之行事其平生蓋多類此者古稱篤
義畧怨犯而不校豈非斯人之徒哉正德丙子除南
城兵馬副指揮倬有譽聞當塗者交相薦之行且遷

矣公奮然曰仕者所以行其志也予雖然亦行其所
志已矣今予老且倦矣若竢其至而後去則亦安知
予之恒不異是也於是懇求歸焉吏部嘉之進公為
兵馬指揮特許其歸給執照使為鄉人式焉歸後二
年為嘉靖甲申七月丙戌公忽以疾卒于正寢計其
生正統己巳十一月壬午春秋七十有六配楊氏有
婦德宜于公弘治壬子十一月丁未先公卒生景泰
辛未九月庚子年纔四十有二云生男子三人世泰
世用世亨而世泰吏部聽選官四女子長適予兄淮
次適徐愷又次適郭某某死值予嫂亦死後繼歸子

兄焉季適党某有孫男子幾人孫女子幾人其裔盛
矣繼配某氏無出世泰等以予知公深宜以銘公之
墓於是繫之辭曰生也好義歿也允賁子孫克世公
乎何累

先兄德瞻墓志銘

先兄諱阜初字聖功後又字德瞻先考已庵府君長
子也天順戊寅十月辛巳母夫人張氏生兄室有異
香五齡讀孝經及論孟書輒解會大義至七齡凡予
史所載若將徧矣作為五七字詩即工致有法發為
文辭可沛然傳也六七歲時從遊康山鄧先生新之

之門有同舍生挾書十五冊先祖母袁太夫人曰所挾何多如此生自以年十五則須讀十五冊爾因詰兄曰汝何弗若生兄對曰不可夫業貴精不貴多多則雜而弗精夫苟雜矣未有弗忘者孔子韋編三絕讀易只易士之學也猶衣人之治衣亡十襲俱紕者凡以成乎其一而及乎其二而已太夫人大異之謂有良孫云九歲時康山與客夜坐值大雪座客蔡雲蔡進者留都名士也謂康山曰是兒神采秀異何不教之以詩能對乎姑試之康山笑曰即試以詩可也於是二子以雪夜宴集命題援筆而成文不加點二子

奇焉因各贈之以詩他日又舉樂天琵琶行令和之
章成頃刻而辭亡損益都下紛然傳頌矣成化己丑
先祖通政府君挈家西歸所至必命賦詩得韻立就
天性至孝母夫人嘗有疾歷十餘載弗瘳兄以齟齬
事奉無間寒暑予今生二十有五曷如兄也作字清
勁有法母夫人病時聞人言保室論佳即自錄一編
至今存之成化丙申十一月甲子年一十又九病厥
卒矣方其卒時邑人無老幼皆如悲親戚焉故先君
及先通政府君相繼徂謝固隱痛深矣今所遺者合
騷賦與詩通百十有二篇因命曰康德瞻集稽古之

士或有取焉兄墓在縣西原顧雜葬者多恐久而忘
失因刻碑以志他日苟有所進則當遷葬佳壤庶以
不沒兄之潛德云爾為之銘曰文不在茲哲人已年
齡雖微施光偉凍松之孫長公子成化丙申葬於此

明故通議大夫右副都御史范恭惠公墓志銘
公諱鏞字鳴遠上世松江華亭縣人也曾祖諱不采
永樂時謫戍鞏昌衛故世為鞏昌人不采生文真文
真生浦浦娶沈氏生公年十四補府學生治禮經有
名塲屋成化丙午中鄉試禮魁明年中乙榜署教諭
於新鄉克勤教事布政使潘鐸給事中李光翰所造

士也嘗聘為四川順天考官弘治癸丑登毛澄榜進士冬十二月授湖廣道試御史巡歷五城豪右憚焉甲寅實授同王給事廷李郎中贊清理宣大馬政牧地有所侵者悉歸於民乃上十三事請歲以實在馬四萬為額額足則以應科馬折銀在官不足始令添補畿內至今稱便而太僕亦多儲積也丁巳刷卷雲南七月而歸父母與妻皆受封己未陞浙江按察司僉事海寧旱

上命王都御史璟來賑官屬承委者百姓多訟不均乃委公公不數日劑量伸縮悉有條理百姓喜曰早

得公來賑我奚患也王公驚嘆曰真按察司奇才遂薦之於

上甲子冬陞四川按察司副使奉

勅整飭建昌兵備時分守內官蘇某戒其下曰范公正直剛方爾輩其慎之乙丑冬丁外艱喪事一遵朱子家禮戊辰服除值劉瑾用事查盤天下倉糧公與補陪之數或勸之謁瑾不聽遂淹居於家者三載庚午秋瑾伏誅始復除四川按察司副使仍兵備建昌蓋瑾用事時天下兵備多所裁革至是吏部乃復用公軍民喜曰還我范青天我輩復生矣建昌所屬會

川有金銀銅錫礦分守內官以國課為名戍卒採挖之苦不可勝言流移死者相望於道公力為

奏罷之軍民咸悅辛未秋八月蜀盜起總制林都御史俊巡撫高都御史崇熙檄下徵建昌土漢民兵策應屬公統之六閱月廖蔭子餘黨范么兒光子等咸授首焉巡按俞御史縉與總制巡撫具功以

聞冬十二月陞浙江布政司左叅政壬申夏四月陞浙江按察使九月紹寧以海潮傷民田廬民不堪命將生不軌陶都御史琰以先往撫者束手無策顧謂公曰君職長憲司雖不可煩以他事然

朝廷軫念黎元之意微君其誰與勝君其往焉公請得銀二萬兩以往不踰月民安堵如故癸酉夏江西盜起

上命陶都御史治兵于衢薦公自代因

命公叅贊其事七月以內艱歸服除陞南京都察院右僉都御史提督操江清占役嚴節制又劾去懷寧侯孫應爵老不任事豪右俯首救過江表肅清未幾陞都察院右副都御史巡撫雲南地方雲南遠在萬里夷漢雜處人情土俗大戾中土公懲姦抹弊無所不盡後王都御史啓會御史羅玉奏計處天下驛傳

以一政令謂公施為政事率多異常至今人猶思之
至於驛傳一事尤多用心不苟豈可率然更改公之
撫滇則何異於王端毅也公行法之際唯理是據一
無所顧朱寧用事時其親犯法即以所犯置法寧含
之會公委官小事嫌孽為罪械繫禁獄備極困辱且
令人誘曰公賂請於寧否且重譴矣公曰予無中人
之產賂將焉具我無罪於

朝廷渠必殺我駢首赴刃而已議死議戍皆不得乃
降為湖廣布政司右叅議正德庚辰正月二十七日
丙辰以疾卒於官由生天順己卯十月五日癸丑春

秋六十又二辛巳夏四月 今上臨御史部請恤遺
直舉真才以裨化理公寃獲伸遂復原職八月巡按
御史曹珪復請表揚忠正大臣以勸百官首論公器
識高明而廉靜簡重稟行貞純而忠清公亮少與彭
澤齊名人常以公輔之器待之是亦當時完名全節
之士若不可以秦漢以下人物論之也欲隆以葬祭
崇以贈謚錄其一孫為人臣勸 制可乃遣苑馬寺
卿郭韶

賜祭一壇禮工二部給賻奠甚優追贈通議大夫都
察院右副都御史謚恭惠祖文真父浦並贈如公祖

妣朱氏妣沈氏妻與梁皆贈封為淑人廕其次子愈
入監讀書刑部尚書唐龍巡按江西時謂公清苦不
改寒士之風忠勤方負純臣之望請祀公雲南

制可令于雲南名宦祠立木主配享尚書富平張統
三原王恕於乎公之存歿哀榮稱譽可謂無忝所學
爾矣初配夏氏邵人夏忠之女生男子三人天民應
期應奎女子四人皆早歿繼配戴氏末年教授大梁
戴儉之女生男子一人恩中戊子禮魁世公之業娶
舉政岷人王鐸之女女子一人適都指揮王麟嫡子
川再繼梁氏靈石令咸寧梁璠之女生男子一人愈

都察院檢校初娶提舉雲西魏璋之女繼娶刑部右
侍郎咸寧張鸞之女女子一人尚未許人恩生女三
人愈生子一人女一人茲公之孫也嘉靖癸未恩等
將以四月二十四日葬公南河之原祖塋以合於夏
淑人戴孺人之兆謂公卒時必欲海為銘其墓石疾
疢所嬰顧至於今始得撰述行事以詔後賢夫世之
君子砥礪名節者嘗後先相望矣然飭於其明倦於
其闇不可枚舉抑奚有如公者公稽古嗜學薦義樂
善海與鄆杜王九思嘗私論之以為難能其立官行
政唐尚書數歎其處有定見行有定守平易近民懷

慨臨事患難所及屹如太山略無私顧其人品豈近
世所恒見哉蓋棺之後公論疊疊益足以徵公矣公
自號謙齋易曰謙尊而光公之謂也又曰謙受益茲
公非益耶銘曰隴山巖巖西土是弁猗此靈粹公生
實含範世表物立懦化貪建昌紹寧反茶為井百姓
誦德古人何慙既清江表旋撫滇南深思熟慮惟民
是懷信法搜戾奚用弗堪大星墜楚箕尾長聯

聖明念舊公論足勘表貞述德溢恩是覃冊勲昭謚
遡命惟三繼魁履孝卓哉長男中子承廕嗣公之裔
南河之渙厥壤實涵築阡於此藏公履簪紹休迪德

我銘可採

對山集卷之三十八

康對山先生集卷之三十九

墓志

奉政大夫戶部雲南清吏司郎中南公封太宜人焦氏墓志銘

公諱金字楚重上世河東人徙居蒲城賈曲里六世祖均肅生四子而諱安義安禮者元季自賈曲徙居渭南秦村故今子孫世為渭南人安義生儼儼生言言生珪配緱氏生六子公其仲焉公之文章行誼公卒時吾友谿田馬伯循志其墓石涇野呂仲木撰其墓碑潛德幽光靡或遺矣二君者世之信人也其言

自當傳而又重之以公之名德海曷能贅其辭說今年八月乙未公配太宜人焦氏卒十二月壬申合葬太宜人於公之玄堂子紹興知府大吉來復以予為之銘予惟公以昌文奇氣自謂凌跨一世苟得志將視衛鄭房杜之業若反手然時或阨焉獨非天耶其居家及訓導新野事非君子躬行其志俟命於天者耶不知蘇湖君子其亦如是是否耶予觀陳羅之自著蓋數拊膺興嘆焉嗟乎先王之道逝哉藐矣誦說繁而本實昧民日相率而為偽予弗知其如何可也讀公戒子數言若曰男子墮地天地四方即尔事矣非

名言邪即此可以益欽公德巍巍然冠諸河華矣太
宜人者渭南處士焦能女也有女德宜於公九井曰
烹飪無弗致其力也公陞秩資縣值關中有甲辰之
饑而舅姑在堂欲謀就養則山川阻遠非校行者所
宜太宜人乃請留養於家自茹草惡備極供奉舅姑
安心無撓若不知為凶年者太宜人之孝也篤生令
子享奉履榮被

錫命獲壽考然則天之報稱有德若是者非邪其慈
以御下仁以撫賤和以處姒儉以訓家皆婦人之難
事此則志其大者生男子二人大吉辛未進士以戶

部郎中出守紹興有文名世逢吉己卯舉人合德厥
兄蓋不但科第顯頡爾已女子二人長嫁王鸞次嫁
單仕孫男子三人軒轅輓軒為生員孫女子三人張
聘李廷珍十八歲死仲嫁生員郭珠餘幼未字公生
景泰壬申十二月戊戌享年六十又三太宜人生景
泰癸酉正月己巳至是享年八十又一傳稱仁者壽
詩言君子有穀遺孫子及宜爾子孫振振兮非公與
太宜人之謂邪豐草之原同寔共終魄返于元化德
傳於奕世天子善人無往弗相予于公與太宜人益
信天監于下昭昭乎誠有不可昧矣銘曰粵惟南氏

世有哲人昭德廣譽至公則新益以佳儼何履弗純
篤生令子為世鳳麟文足傳世風雅可振精典輝燦
光我三秦豐原峨峨渭水粼粼構爾玄堂佳氣孔臻
孝子不匱萬年永存

楊于敬墓志銘

于敬名止榮祿大夫右軍都督府都督同知容堂楊
公次子也母曰夫人張氏以弘治乙卯三月癸巳生
于敬穎異奇瑋容堂公鍾愛焉十歲時省稼藍田諸
力田者不敢私隱所穫及歸租來乃數倍往歲容堂公
心奇之旋命就學外傳舉學諸生皆自以為不及及

長凡儒墨兵農律曆象緯以及醫卜之事靡不覽識
指要方欲黽勉科第而容堂公提兵四川于敬日周
旋戎慳容堂公曰從我勤勞王事孝矣汝業何以自
卒對曰事君事親即臣子之業也胡為不卒後容堂
徵治都督府事尋轉提督漕運于敬皆隨事左右凡
容堂公所為事必身率家衆敬奉行之修賓客節侈
泰容堂公位極樞府名譽日重士大夫爭相禮重公
方謙讓挹損而于敬益恭承德音身無過行一時貴
遊公子未之能或先也前歲庚寅春予有事省府于
敬以容堂公之交予厚也數來訪予邸舍中每語皆

有微言又善識方今之務予以為容堂有子也今年
甲午四月壬戌于敬不起矣於乎惜哉去年容堂公
致政歸以書致予予亟入省會容堂公乃于敬又數
訪予其言益有所據又談說玄理疊疊不倦予知其
有所感而將有所圖也顧未能悉扣其所聞及得張
安世狀見其孕陽子之論又引其病間之語云孕陽
生燥燥乘其心安世曰于敬之病蓋自煉生然予亦
嘗視于敬之疾矣顧憶不及此未與之究非數也邪
于敬娶吳氏總兵吳公之文生子女各一皆不育疾
將革乃以兄西安左衛指揮使于雲季子七十為嗣

享年四十歲是歲月日葬咸寧延興之原從祖兆也
世有懿寶方產德門矣旋復失之要關係非小於乎
惜哉容堂公以予素愛于敬宜為之銘銘曰來孰使
之去孰主之李賀爽齡邵攸弗兒豈數然邪抑其故
邪予不得而知也延興坦坦草木蕃蕃卜言歲玉胡
不萬年

平山先生墓志銘

先生姓王氏諱璇字天器河南郊人也高祖伯達生
澤澤生宗宗娶李氏生先生弱冠為縣學生七舉鄉
試不得乃歲貢入國子尋補南鄭縣學訓導南鄭僻

在隴蜀間母夫人李又老不得破所憚而去而
朝命又不可廢家又貧又不可無往以闕親意此至
居止又陋敝不能避風日生徒又劣肆不率人皆戚
然不堪先生亢然志曰親以某廩膳幾年謂得為是
官將可以報

國家哉先鄙其徒徒將何以為乃力與整頓夷其凸
復其情諸生凜然承之明年科目相繼中式若干人
不終任吏部特奏陟宜川縣學教諭宜川去郊稍近
至是始能奉母以往而宜川又近北風土寒苦居弗
堪乃又思郊先生曰吾所以為官祿者本以求養老

母也母去我何以鬱鬱於此我又以何求也遂弃官
同母歸歸幾年弘治癸亥七月十六日以疾卒合其
生正統壬戌七月廿六年六十有二明年正月廿日葬
平山之原娶聶氏隱君子志高之女生子六人尚忠
尚文尚綱尚明尚簡尚志尚綱舉進士為兵部職方
主事明簡皆縣學生三女長適高光霽次適學生劉
山青又次適于思瀾孫男六淞湯湏沉渭潼孫女四
於戲先生勤于教子子成又不得久食其奉去年秋
職方君嘗喜其除得先生見之余謂將可以久視所
天也今年二月先生歸又五月乃不起此痛尚可言

邪平山在郟城南先生兒時從外祖季公秀實居及
長往來恒依與既又徙居其陽自謂當老此中乃今
有果然也學士大夫知先生樂居於此或為歌詩稱
述之遂謂為平山先生海與職方同年嘗獲拜先生
職方以銘於海乃銘曰居無媿於其心遠不惡於其
隣由之於道不飾以真茲為平山先生之墳

靈寶學生楊象先墓志銘

予以嘉靖丁亥春過靈寶訪見山楊子象先迎予于
道色溫而氣平非積有所養者不能也泊居靈寶乃
象先日見予有所問難皆䟽暢不留出其所為文

爾雅醇厚似其為人予意中州之士如象先蓋已鮮
乎其儷已今年春二月辛酉予再往訪見山道渭南
得南墅許子廷陳書暨狀云象先以是月十四日丙
辰奄疾歿矣於戲惜哉有士如象先天顧美其才而
嗇其壽如此將胡為而生哉豈其數之所止雖天亦
莫如之何哉於戲惜哉有象先之才而不得底觀厥
綬其能悠游歲月克觀厥綬又將誰哉按狀象先名
守世為弘農靈寶人蓋關西之裔也五世祖克明
國初為都察院左都御史高祖春力田弗仕曾祖懋
以出粟救荒

詔授徵仕郎祖鍊監察御史父惟康即見山公雲南
左布政使母許宜人太保襄毅公女也以弘治庚申
月日生象先於京邸自就口食即修謹如成人後襄
毅為吏部尚書而見山為刑部郎宜人每歸寧襄毅
見象先曰孺子何物盎盎如是試以詩對應聲而荅
襄毅喜抱置膝上象先益恂恂畏敬毋少肆也見山
轉官蜀臬命師授學即重自砥礪後長憲關內值大
復何先生仲默提學來即從之遊何先生數會予則
言其才美不置歸為縣學生試壬午鄉舉不第顧益
刻苦于學丙戌歲考提學王君取置第一補廩膳生

今年戊子試且近矣衆方以魁選望象先乃忽已矣
年才二十有九爾於戲惜哉象先天性孝友見山往
雲南留與其妻張氏事太宜人于家張氏者亡友山
東按察使洛陽道夫女也篤意奉若朝夕靡怠提學
蕭君特嘉其行以風士類太宜人病象先凡五月不
脫衣及卒哀毀踰禮人莫不以為難也在蜀時聞學
琴于人不數日悉得其妙父母有不悅即鼓數曲及
懽乃已待諸第怡怡僂僂各極其意其衣服器玩一
無所恡與人交恭敬若初退無後言有過則婉曲以
諫與遊者莫不以為良也卒之日自縣學官師以及

鄉黨親友罔不號泣於家固所以惜其才亦有以哀其德也三月一日癸酉將葬西原祖塋之次予子栗象先妹壻也而象先弟象賢又娶于予弟南川義當有銘銘曰胡為而生胡為而奪豈數之奇抑天之閔九原有知永慰斯作

扶風耆賓樊翁墓志銘

翁諱現字世珍上世三原人也始祖得祿客扶風岐陽鎮因卜居岐故子孫世為扶風人得祿生思敬思敬生克誠克誠生亨亨生有常有常生禮禮娶王氏生翁王氏早卒翁鞠于伯母洎長又為繼母鄭所逐

翁曰此父命欲試我自立否爾即與其配馬氏極力
生理有屋半間不蔽風雨尋補完之翁曰此吾起家
兆也翁耕商馬紡績數年家有中人之產雖值甲辰
之飢父母妻子俯仰如舊客遊半天下積貲彌萬事
為岐陽巨家間為諸子曰誰謂天道難信哉吾南至
江淮北盡邊塞寇溺之患獨不一與者天監吾不欺
爾負易之際人以欺為計予以不欺為計故吾日益
而彼日損誰謂天道難信哉翁雖方以律家而和以
處衆粒米寸布切切寓訓其子孫洎其婦女罔不知
稼穡之艱蠶績之務者翁之教也自少至老客遊家

居惡聲不至詩所謂終溫且惠淑慎其身者非與七
旬已後鄉之士大夫咸敬重之縣官屢請為鄉飲賓
不從壬辰歲河東楊侯叔厚來知扶風首請翁為賓
而加禮焉始從之時年已八十矣其自慎不輕又如
此嘉靖十四年乙未二月二十一日壬子翁卒于家
由生景泰四年癸酉十一月三十日壬午享年八十
又三生男子二人居仁廩膳生員由義紹業于翁孫
男子七人屏垣境居仁出城封均提由義出屏廩膳
生垣城皆從事于學餘幼孫女子三人居仁生一適
生員王殷由義生二長聘王宮季幼是年五月二十

四日甲申居仁等將合葬翁于其配馬氏之窆請銘
于予予嘗擬居仁與屏行誼文學當亢宗光姓而翁
之為人又素所雅重於是為之銘曰迓而自樹克孝
若教誠而不欺孰敢為校壽踰八旬殆仁所蹈子孫
衆多其德之紹亢宗光族幸昭天報我銘在塵式陳
嘉告

張母淑人劉氏墓志銘

淑人秦安隴城人故嘉議大夫刑部左侍郎松壑先
生張配也父曰劉昭世有厚積能以長厚稱於鄉娶
某氏生淑人性貞順有則年及笄歸松壑先生孝於

舅姑敬于夫子張氏小大咸宜焉夫松壑先生以儒業起家大抵貧窶難自盡而淑人一切與伸縮使先生心無所移得以竟志畢力卒成聞人鉅公其修守婦道何如也後先生登己巳進士歷刑部主事至都御史侍郎先後奉

詔勘覈不可悉數而所在稱平要之淑人所相不少當先生在朝時淑人朝賀三宮獨以賢德知名于皇太后嘗特被詔見諸命婦同朝者悉視法焉弘治己未先生謝政歸寓華陰又三年辛酉有病乃不起孝宗皇帝詔有司歸葬秦州淑人哀毀踰禮雖子顯

家昌而事事必躬為處畫曰心所當盡直不容自己
爾正德己酉子潛以禮部郎中出守廣平明年奉板
輿迎淑人而東又明年淑人歸歸四年潛方以山東
左叅政謝政至秦不數月淑人遘病明年乙亥正月
十五日卒矣由生正統丙寅八月七日春秋七十工
部有檄屬有司啓壙以明年丙子三月二十五日與
先生合葬西崦之陽潛來屬海銘其墓石海當淑人
迎養廣平之日嘗以姻鄰之末得拜瞻懿範具知淑
人德意之盛與所聞不殊以為恭儉慈惠之實甚非
近世婦人所有乃宜受享履祥眉壽不替而亦止此

雖康齡已盛豈天所施於令母者僅爾爾也淑人內
順外嚴膺顯服盛男女侍從雖衆而內外肅然語不
相聞曩先生使山東故城知縣党公看公故人也以
麥十斛來致於家給以先生命欲必受之淑人曰此
豈不知党公為故人然公平生於人實無所受即果
有此命則義已難聽每遇

頒賜時鮮必薦而後用曰此皆先德所致教訓諸子
務欲咸成聞人有所遊嬉必痛加笞責尤嚴其遊從
之人曰此染習之漸不可不慎也生男子四人長即
潛丙辰進士歷官如右所云要考功員外郎華州東

思誠女次瀾國子監生娶泚州衛都指揮楊某女次
沐亦國子監生娶開州判官秦州馬璿女李濟義官
取隴城南某女女子二人長嫁岷州衛指揮洪範次
嫁進士華州東郊瀾與二女皆先死沐亦後淑人八
月死孫男一之桀潛子娶即海文孫女五一嫁秦州
衛指揮胡寧子宗仁餘尚幼曾孫女一銘曰崦嵫之
西其地孔嘉與先君子同利以居止

叔祖醫學訓科府君墓志銘

府君姓康氏諱佐字自輔故資善大夫工部尚書濟
川之孫中議大夫贊治尹太常少卿以德之姪中憲

大夫通政司左通政以敬之子關中武功人也母曰
宜人紀氏故大中大夫交趾布政司左布政某之女
歸中憲九年生府君年十六通諸書大義作五七字
詩歌皆可觀及長喜讀素問黃帝諸書遂以醫名關
中後遂為武功縣醫學訓科訓科二十幾年以老疾
請致仕日日讀老子書能感動鬼神其為醫又不計
貨利病者至雖宜用至貴藥皆輒取予即不報不計
也又能與病者踰年決死生千百人亡一謬焉年六
十五弘治癸丑立春之前日觀迎春者海奉歸壽飲
甫已而去去且未久也以痰疾卒於乎痛哉府君天

性孝友先祖考凍松府君於府君蓋伯叔兄弟也府君事之若嚴父焉府君能煅煉八石為金銀雖至貧不肯少用曰吾但識有是術耳然此雖極精其高者不十數年輒復為銅錫彼十數年者何負我也吾且今無子以嗣先人假以飢餓死我我無歎也是後果以別室出三男子焉可謂貧而難守而獲矣孺人曰劉氏與母宜人俱東安人劉亦名家蓋亦世與紀氏為姻鄰者其別室者長安市井人徐某女也是年二月甲子合劉孺人葬縣北祖阡西旁姪孫海志且銘曰於戲貧而無怨有而不施卒死以貧而又弗悲

其尤難耶有三男子祀以不墮天如斯耶

對山集卷之三十九